

龙溪精舍丛书

龙溪精舍丛书

兩漢三國學案卷之四

唐晏學

尙書

夏侯始昌魯人也通五經以齊詩尙書教授自董仲舒韓嬰死後武帝得始昌甚重之始昌明於陰陽先言柏梁臺災日至期日果災時昌邑王以少子愛上爲選師始昌爲太傅年老以壽終族子勝

夏侯勝字長公初魯共王分魯西甯鄉以封其子節侯別屬大河後更名東平故勝爲東平人勝少孤好學從始昌受尙書及洪範五行傳說災異後事蒯卿蒯卿者倪寬門人又從歐陽氏問爲學精孰所問非一師也善

說禮服徵爲博士光祿大夫會昭帝崩昌邑王嗣立數
出勝當乘輿前諫曰天久陰而不雨臣下有謀上者陛
下欲出何之王怒謂勝爲祆言以屬吏吏白大將軍霍
光光不舉法是時光與車騎將軍張安世謀欲廢昌邑
王光讓安世以爲泄語安世實不言迺召問勝勝對在
五行傳曰皇之不極厥罰常陰時則下人有伐上者惡
察察言故云臣下有謀光安世大驚以此益重經術士
後十餘日光卒與安世白太后廢昌邑王尊立宣帝光
以爲羣臣奏事東宮太后省政宜知經術白令勝用尙
書授太后遷長信少府賜爵關內侯以與謀廢立定策

安宗廟益千戶宣帝初卽位欲褒先帝詔丞相御史與列侯二千石博士議於廷中皆曰宜如詔書勝獨以爲武帝亡德澤於民不宜爲立廟樂公卿共難勝曰此詔書也勝曰詔書不可用人臣之誼宜直言正論非苟阿意順指議已出口雖死不悔於是丞相義御史大夫廣明劾奏勝非議詔書毀先帝不道及丞相長史黃霸阿縱勝不舉劾俱下獄有司遂請尊孝武帝廟爲世宗廟奏盛德文始五行之舞天下世世獻納武帝巡狩所幸郡國凡四十九皆立廟如高祖太宗焉勝霸旣久繫霸欲從勝授經辭以罪死霸曰朝聞道夕死可矣勝賢其

言遂授之繫再更冬講論不怠至四年夏關東四十九郡同日地動或山崩壞城郭屋室殺六千餘人上乃素服避正殿遣使者弔問吏民賜死者棺錢因大赦出勝爲諫大夫給事中霸爲揚州刺史勝爲人質樸守正簡易無威儀見時謂上爲君誤相字於前上亦以是親信之嘗見出道上語上聞而讓勝勝曰陛下所言善臣故揚之堯言布於天下至今見誦臣以爲可傳故傳耳朝廷每有大議上知勝素直謂曰先生通正言無懲前事勝復爲長信少府遷太子太傅受詔撰尙書論語說賜黃金百斤年九十卒官賜冢塋葬平陵太后賜錢二百

萬爲勝素服五日以報師傅之恩儒者以爲榮始勝每講授常謂諸生曰士病不明經術經術苟明其取青紫如俛拾地芥耳經學不明不如歸耕

尙書夏侯氏說

三公諸侯用山龍九章九卿以下用華蟲七章皆備五采

優賢揚厯厯試也謂揚其所厯試

天右王者故災異數見以譴告之欲其改更若不畏懼有以塞除而輕忽簡誣則凶罰加焉其至可必

臚宮劓割頭庶劓

黥辟疑赦其罰率古以六兩爲率

正義引

按夏侯書說久亡近馬氏輯本又多以意屬不足據也今僅擇數條其餘不復多及之然而治大小夏侯學諸家所引皆師說也但求之於各傳中足矣

黃霸字次公淮陽陽夏人也以豪傑役使徙雲陵霸少學律令喜爲吏武帝末以待詔入錢賞官補侍郎謁者坐同產有罪劾免後復入穀沈黎郡補左馮翊二百石卒史馮翊以霸入財爲官不署右職使領郡錢穀計簿書正以廉稱補河東均輸長復察廉爲河南太守丞霸

爲人明察內敏又習文法然溫良有讓足知善御衆爲
丞處議當於法合人心太守甚任之吏民愛敬焉自武
帝末用法深昭帝立幼大將軍霍光秉政大臣爭權上
官桀等與燕王謀作亂光旣誅之遂遵武帝法度以刑
罰痛繩羣下繇是俗吏尙嚴酷以爲能而霸獨用寬和
爲名會宣帝卽位在民間時知百姓苦吏急也聞霸持
法平召以爲廷尉正數決疑獄廷中稱平守丞相長史
坐公卿大議廷中知長信少府夏侯勝非議詔書大不
敬霸阿從不舉劾皆下廷尉繫獄當死霸因從勝受尙
書獄中再隄冬積三歲迺出語在勝傳勝出復爲諫大

夫令左馮翊宋畸舉霸賢良勝又口薦霸於上上擢霸
爲揚州刺史三歲宣帝下詔曰制詔御史其以賢良高
第揚州刺史霸爲潁川太守秩比二千石居官賜車蓋
特高一丈別駕主簿車緹油屏泥於軾前以章有德時
上垂意於治數下恩澤詔書吏不奉宣太守霸爲選擇
良吏分部宣布詔令令民咸知上意使郵亭鄉官皆畜
雞豚以贍鰥寡貧窮者然後爲條教置父老師帥伍長
班行之於民間勸以爲善防姦之意及務耕桑節用殖
財種樹畜養去食穀馬米鹽靡密初若煩碎然霸精力
能推行之吏民見者語次尋繹問它陰伏以相參考嘗

欲有所司察擇長年廉吏遣行屬令周密吏出不敢舍
郵亭食於道旁烏攫其肉民有欲詣府口言事者適見
之霸與語道此後曰吏還謁霸霸見迎勞之曰甚苦食
於道旁乃爲烏所盜肉吏大驚以霸具知其起居所問
豪釐不敢有所隱鰥寡孤獨有死無以葬者鄉部書言
霸具爲區處某所大木可以爲棺某亭豬子可以祭吏
往皆如言其識事聰明如此吏民不知所出咸稱神明
姦人去入他郡盜賊日少霸力行教化而後誅罰務在
成就安全長吏許丞老病聾督郵白欲逐之霸曰許丞
廉吏雖老尙能拜起送迎正頗重聽何傷助之毋失賢

者意或問其故霸曰數易長吏送故迎新之費及姦吏緣絕簿書盜財物公私耗費甚多皆當出於民所易新吏又未必賢或不如其故徒相益爲亂凡治道去其泰甚者耳霸以外寬內明得吏民心戶口歲增治爲天下第一徵守京兆尹秩二千石坐發民治馳道不先以聞又發騎士詣北軍馬不適士劾之軍興連貶秩有詔歸潁川太守官以八百石居治如其前前後八年郡中愈治是時鳳皇神爵數集郡國潁川尤多天子以霸治行終長者下詔稱揚曰潁川太守霸宣布詔令百姓鄉化孝子弟弟貞婦順孫日以眾多田者讓畔道不拾遺養

視鰥寡贍助貧窮獄或八年亡重罪囚吏民鄉于教化
興于行誼可謂賢人君子矣書不云乎股肱良哉其賜
爵關內侯黃金百斤秩中二千石而潁川孝弟有行義
民三老力田皆以差賜爵及帛後數月徵霸爲太子太
傅遷御史大夫五鳳二年代丙吉爲丞相封建成侯食
邑六百戶霸長於治民及爲丞相總紀綱號令風采不
及丙魏于定國功名損於治郡時京兆尹張敞舍鵲
飛集丞相府霸以爲神雀議欲以聞敞奏霸問郡國上
計吏有耕者讓畔男女異路道不拾遺及舉孝子弟弟
貞婦並行僞貌有名亡實傾搖解怠甚者爲妖假令京

師先行讓畔異路道不拾遺其實亡益廉貪貞淫之行而以僞先天下固未可也卽諸侯先行之僞聲軼於京師非細事也天子嘉納敝言霸甚慙霸又薦樂陵侯史高可太尉天子使尙書召問霸太尉官罷久矣丞相兼之所以偃武興文也如國家不虞邊境有事左右之臣皆將帥也樂陵侯高帷幄近臣朕所自親君何越職而舉之尙書令受丞相對霸免冠謝數日乃決自是不敢復有所請然自漢興言治民以霸爲首甘露三年薨謚曰定侯

按前漢循吏以黃霸爲稱首而考其所得由經術

來也其治潁川也彷彿子產之治鄭西門豹之治
鄴然不出孔門富教之旨有以知其所得矣及其
入相乃治減於在潁川時此則天資限之所謂不
可爲滕薛大夫者也

周堪字少卿齊人也與孔霸俱事大夏侯勝霸爲博士
堪譯官令論於石渠經爲最高後爲太子少傅而孔霸
以大中大夫授太子及元帝卽位堪爲光祿大夫與蕭
望之並領尙書事爲石顯等所譖皆免官望之自殺上
愍之廼擢堪爲光祿勳語在劉向傳堪授牟卿及長安
許商長伯牟卿爲博士霸以帝師賜爵褒成君傳子光

亦事牟卿至丞相自有傳由是大夏侯有孔許之學商
善爲算著五行論歷四至九卿號其門人沛唐林子高
爲德行平陵吳章偉君爲言語重泉王吉少音爲政事
齊炅欽幼卿爲文學王莽時林吉爲九卿自表上師冢
大夫博士郎吏爲許氏學者各從門人會車數百兩儒
者榮之欽章皆爲博士徒衆尤勝章爲王莽所誅

孔霸字次孺治尙書事太傅夏侯勝昭帝末年爲博士
宣帝時爲大中大夫以選授皇太子經遷詹事高密相
是時諸侯王相在郡守上元帝卽位徵霸以師賜爵關
內侯食邑八百戶號褒成君給事中加賜黃金二百斤

第一區徙名數於長安霸爲人謙退不好權勢常稱爵位太過何德以堪之上欲致霸相位自御史大夫貢禹卒及薛廣德免輒欲拜霸霸讓位自陳至三上深知其至誠廼弗用以是敬之賞賜甚厚及霸薨上素服臨弔者再至賜東園祕器錢帛策贈以列侯禮謚曰烈君始霸上書求奉孔子祀元帝下詔曰其令師襄成君關內侯霸以所食邑八百戶祀孔子焉故霸還長子福名數於魯奉夫子祀

孔光霸之少子也經學尤明年未二十舉爲議郎匡衡舉光方正爲諫議大夫成帝卽位舉博士數使錄冤獄